

莆陽居士蔡公文集

五

莆陽居士蔡公文集卷第九

箴

進黼宸箴狀

右臣伏覩 詔書宣諭三館臣僚或朝廷大事邊防機宜許令密陳章疏或乞上殿敷奏者臣竊聞太宗皇帝兵戎初定乃作三館購藏天下之書精選四方之士仍於館下旁設便門或時臨幸或即召對故當時之得失下民之利病多所推究而施行之 真宗皇帝屬世治平游意文藻詞臣之列嘗預詢訪於是天下之人知備官禁闥者不獨繙

端明集九

蔡仲共

討蠹書亦有以通上聽而裨國治矣伏自 陛下臨御以來嚮二十餘年未嘗一至所增官屬准前數倍未嘗一召今者特布德音開誘言議茲所以見 陛下憂勤之至人人自力思竭志慮以裨萬分之一臣愚不知 陛下將以成好問之名歟直欲擇至當之言而用之也臣智識蒙陋不敢廣引古記多屬空文輒求于今要急之務而 陛下之所欲知者謹撰成黼宸箴一首書爲兩軸每句之下條陳事實別疏一通各隨狀上進臣聞唐太宗凡言事有益於政者書之屋壁以爲警言戒伏惟

陛下不以臣之狂直而棄之幸置臣箴詞於戶牖
間時賜省覽原其所條事實終始則今安危之勢
可見矣昔漢賈誼論及時事以謂可爲慟哭者以
臣今日之心知古人之言不虛謬矣干冒 宸嚴
無任戰汗之至謹具狀奏 聞謹奏

箴

丕顯元聖上奉天時躋俗於禮任材以宜肅治家
政大隆本支好問益廣去邪勿遲利急思困兵連
慮危法令必信恩賞無私威福是守聽斷不疑太
平可致決所施爲

別疏

臣所進黼宸箴每句之下條陳事實列於左

丕顯元聖上奉天時

臣愚淺不知 陛下天地之造竊謂丕顯元聖上
奉天時者以天人交感之應合若符券比年以來
地震日蝕黑風災火變見之祥可謂多矣臣謹按
先賢所論地震者陰迫於陽也日蝕者陰薄於陽
也黑風晝冥者陰盛於陽也災火者陰極於陽也
如此之類皆陽不勝陰之所致矣陽者君象也陰
者臣下也夷狄也婦女也今夷狄內侵則見之矣

必有臣下潛弄威權宮中多收冗列故上天再三
警戒欲 陛下思而革之轉災爲福矣臣聞
太祖撥五代之亂 太宗平定天下 眞宗思與
百姓休息至於建立經久之業變更非便之制將
有待於 陛下也 陛下專政以來執議之臣謂
天下已安循襲舊常可以宴安而無虞矣不探本
根不責事實今日夷狄侵侮生民重困豈非因循
苟且之患乎 陛下以是觀之前日之失可知而
又重於改作則後日之患將如何哉今政之弊僥
倖姑息寢以成俗矯此弊者非任誅賞考功實莫
能治之上無姑息下無僥倖則姦人無所容矣上
天之戒 陛下非不切也 陛下答天之意非不
勤也每聽事至日昃而不食然皆有司奏覆細碎
之務非天下之治本伏惟 陛下精求久弊不憚
改作自揔威令強陽而抑陰自然天心悅豫而萬
事舉矣

躋俗於禮

臣聞唐末強臣擅兵分裂疆土五代更易千戈日
尋上令急逼誅求無已百姓無聊不勝其弊奪攘
苟活父子之恩不能相保天下之俗不遵廉恥之

節壞敗爛熟莫知其非我宋之興一革海內休養生息四五十年無甲兵之患民財贍足侈靡偷薄漸染成俗大臣者天下之表也相競廣市田宅爭求重利況百官哉況下民哉於是官吏曲獄受賄而抵死者案牘相繼豪富之家狗馬婢妾無有制度縱欲相矜財所不及者則極力爲之恩義之薄而財利之厚上自大臣下及黎庶莫不然也今兩制已上之官居父母喪許不解職欲民興孝其可得乎近臣苟進黨附相傾審官臣僚日相詆訐朝廷且尔欲民興讓其可得乎衣冠之家至有父子

相殘夫婦相剋且下民之愚尤可恠駭況列在仕官居民之上而悖戾至此禮義之方亦幾盡矣臣竊思其源蓋天下之治一斷於法法之所禁咸避之治民之吏知法而已禮義之方鉗口不言誠有立經制興禮讓之士俗必指爲闊誕然治天下不由於禮者莫能至也伏惟 陛下察俗薄惡擇任賢材興立典制上下有節車服有序禮讓興行僭侈衰息豈不盛哉臣之所言乍若高論復而思之甚易行也

任材以宜

迎送略無暇日其餘兩制兩省以上近侍之職循
環迭取若探諸懷臣欲備舉則文繁乞 陛下
向來所陳職局及陝西被兵州郡守臣每歲凡更
幾人及侍從之臣凡歷數年因何功效致官至此
則弊可知矣三曰官數不定今天下建官之數但
覺負數多爾 先朝樞密龍圖等學士及待制侍
從之官蓋僅有焉今多者至十數而少者五七人
三館職名以僥倖恩澤比前增倍又樞密院武臣
審官院京朝官三班院使臣流內選人授官之後
伺候闕次近者一年而遠者二年此皆入官之路

不定負數紛紛冗食可勝道哉四曰無功而賞今
大臣兩省已上官南郊及每年聖節各與一子官
非時請乞不與數中轉運使提點刑獄等率有南
郊恩例既以無功迭受恩賞故邊上臣僚小有勞
績便加官爵只務姑息蓋勢不得不然自建官以
來未有如斯之濫也京朝官三年使臣五年並與
磨勘遷官先朝名曰磨勘者蓋考功過今但默默
署名無他罪咎或貪墨未敗或都無課最計年取
進而至顯官因循之弊乃至於此大可嗟也臣聞
易之道窮則變變則通通則久若朝廷立官之弊

臣聞馭邦之大莫大於建官材有短長官有小大故隨其所宜而任之則事無不舉矣臣以謂今日建官之法為弊至深取之不程其材任之不稱其力因循滋久莫之變更臣請略條建官之弊大者有四一曰材不稱官臣不敢備舉百官之不稱者借如兩府大臣為 陛下之股肱繫天下之輕重得人則治其失則危今日之居是任者或以久次或以例遷久次謂累年而至者故張若谷以年老乞備政府例遷者謂狀元及第數年便或以例遷至卿相不計材能不考功績攀緣而進即授以天下之柄幸而材賢則福及於下苟非其材而使之財

制群生扶持重器豈不痛哉董仲舒曰小材累日不失為小官大材雖未久不害為輔相蓋論材與否也今用一不才則天下之人皆知輕視公相而有苟進之心願 陛下熟思其姦邪與不才之人必速退之而忠直材賢之人必速進之救溺之勢不可緩也二曰官守不乂借如三司使副判官皆專筦財利臺官諫臣糾正朝綱歲補時闕發運轉運使均輸征賦廉察風俗列郡太守問民疾苦此皆至重之寄 祖宗舊規率有年課今之除授但作踐歷資序內則踵迹相躡立登貴仕外則州郡

宜更變之則其道可久矣若夫施設之方陛下
儻賜允行臣當條列以聞

肅治家政

臣聞記曰正家而天下定聖人序詩以關雎爲三
百篇之首在易家人曰婦子嘻嘻失家節也故正
家之道貴乎謹嚴以表天下 太宗朝陳留尉上
書乞減放宮人 太宗皇帝宣諭宰臣曰宮中不
過三百人皆有職事不可減也臣乞 陛下以今
日宮闈之數比先朝凡多幾倍況又多取閭巷之
人展轉給使遂至數多此微賤之流素習鄙俚之
事非能知禮度之節苟不嚴肅泣之令其畏憚則
易所謂失家節也自古嬪御之多率皆無益而有
損陳隋之失唐之中圯皆以婦人也臣乞 陛下特
令揀放踈冗之列任其自安以全天地生生之德
庶天下之人上知 陛下薄於自奉縱有率斂皆
緣軍國所須不爲無用之費也

大隆本支

臣聞三代以前分建親族以爲諸侯及天子威令
不行諸侯強盛戰攻攘奪兼并微弱秦始皇率乘
此勢以取天下懲前之弊罷侯置守子弟無尺土

之封及一夫大呼破碎潰壞漢興鑒秦之孤分立宗族裂地廣大率有七國之變其後用主父偃推恩之策藩戚微弱王莽依外戚之權知劉氏力孤遂篡神器曹魏翦弱親戚未幾而亡晉室分兵八王迭相攻奪以亡天下唐興諸王出與民事分領兵柄明皇以臨淄王勒兵入除內難及即位之後反疑骨肉諸王不令出閤恩愛雖厚而實奪其勢安祿山之亂明皇幸蜀諸王被害者甚衆德宗朱泚之亂宗枝略盡故有百王子塚以其不可勝數也文宗嘗欲分遣宗室補除郡吏向外婚嫁終以

不斷事不果行及昭宗時韓建包藏禍心先奏諸王不合典兵請歸十六宅及與劉季述同謀發兵圍十一王至石堤谷無問長幼盡殺之朱全忠宴九王於九曲池殺而埋之於是唐之苗裔盡矣而社稷隨之臣詳觀前古區處乖宜乃令至親不相保養可爲慟哭臣請論之三代分封五等相承地小力薄雖強弱相并而周之年祚延及八百秦不與子弟分封及其亂也無以繫天下之心纔傳三世遂至移祀漢七國之亂由裂地過大晉八王之亂由領兵太盛其亡也皆以宗族微弱唐室之制

尤爲失策幽閉宗族聚爲一處百夫環之引首受戮豈不痛哉使文宗之計果行選擇賢材列補外郡當其亂時縱不能作勤王之師亦足以自爲安全之計豈肯父子兄弟盡爲魚肉乎況大盜之興知王室有維城盤石之固豈敢輕視而竊取哉伏惟陛下鑒前古成敗擇而行之

好問益廣

臣聞人主聰明莫不欲周於天下然有蔽於近者蓋詢訪之弗廣耳切聞民間之言以謂西北二邊事宜奏至左右近臣當對覆之時多小其事以爲

不足懼其說則曰不欲陛下盡知慮貽主憂其實不欲陛下盡知之耳陛下盡知則焦勞益深督責愈切當有成效故特小其事以寬其責也臣輒陳人君之聰明而興壅蔽而亡者願陛下省擇鑒戒焉唐太宗著司門式云其有無門籍人有急奏皆令監門司與仗家引奏我太祖手詔百僚許令轉對陳論得失故當時號爲英主而聲名垂於不朽皆廣聽而興也秦二世山東有反者而使者輒曰羣盜不足憂二世悅之常居宮中與趙高決事羣臣罕得進見及沛公兵數十萬至而二

世乃驚秦之亡無救矣陳後主用沈客卿掌機密
隋軍至境上並抑而不言孔範亦言無渡江理但
奏妓縱酒不輟隋軍下陳得其境上密啓猶有未
開封者是二主豈欲自取危亡哉然託任非人而
蔽蒙至此蓋聽之不廣而亡也伏惟 陛下監前
代之興亡救當今之事實或邊上大事不時盡聞
則民間細碎利害何由上達伏惟 陛下視朝之
暇許百僚轉對或召侍從之臣周詳辨論則古今
成敗百姓冤隱安邊之策富國之術不日悉陳於
前矣

去邪勿遲

臣竊見 陛下頻降詔書戒敕朋黨然未聞

陛下決然區別而去之臣聞君子以道相濟思進
其類古人謂禹稷臯陶轉相汲引不爲比周至於
小人以利相合欺蒙險詖殘害忠良以危邦家故
人主惡而去之去之之術在辨邪正二端耳唐李德
裕對武宗曰正人呼邪人固爲邪矣邪人呼正人
亦爲邪矣何以辨之譬諸草木焉松柏孤生枝幹
直上此正人也藤蘿之性必須依倚乃能自存此
邪人也其論甚明而人主難辨者不察小人結附

之因也臣竊謂結附之因蓋人主不自選任群臣其進用之速者皆緣薦引不考功察實權之所聚一士獲進百人趨之更相訾譽浸成黨與人主雖惡之已堅牢而難動也臣請 陛下思之凡今左右近臣出於聖慮自擢用者幾人且擇兩府大臣必於兩制兩省之官 陛下豈不思其何所因緣而至於此苟不出於聖慮則其微賤時已有結附之因及其貴近安能自去朋黨唐文宗謂河北賊除去不難而此朋黨去之至難臣竊不取夫貴為天子持天下殺生之柄而以去朋黨為難宜乎唐祚之衰矣夫去邪用正則安用邪去正則亡邪正參用則危伏願 陛下明辨邪正之端正則用之勿疑邪則去之勿遲苟以邪正參用而治天下者譬猶耕石田而待稔也

利急思困

臣聞為天下者斂天下之財非以自奉將以致天下之安也故財有常入亦有常出下堪其力雖輸而不怨上無所私雖用而不愧當其無事之時儲峙素具雖有兵戎水旱之患無名之斂不興焉我太祖承五代弊病之餘攻戰未已外給兵食猶且

思蓄羨財以贖中國男女沒虜者以歸雖大志未償而仁心之洽著民骨髓我太宗一統方內悉去無名之賦於是天下之民賴焉有司嘗擬毀棄弊帷之屬以聞上令滌染合作諸軍旗幡數千種蓋我祖宗踐歷艱難周悉民人之苦故尺帛斗粟不虛費也陛下承統弥二十年迺者邊陲無患用度差廣民言籍籍皆謂祖宗積聚之餘多入幸臣之家及西寇干紀隨急配斂天下騷然一隅之動其勞且尔況有大於此乎三司筦天下之利而使副判官纔至又遷簿書首尾尚未能通曉

所言目前細碎誅剝之事以自塞責豈肯爲久計而興大利臣竊見唐陸贄論德宗遷幸之由其略曰常賦不足即令促限又使別配設筦權之科行貸商之法鬪私牧取馬責將家出兵主第王侯咸輸屋稅裨販夫婦畢筭緡錢一旦盜興用以藉口臣竊思兵興以來贄所陳之事稍稍施行矣今戍兵益衆供饋益多後日誅求勢力必愈甚時不幸有旱澇之災百姓貧困奈何救之古者大盜之興皆緣旱澇不足因民之怨求國之際以爲凶亂朱泚入長安令曰吾不稅汝間架矣皆取利太深而招

怨亂也近者 陛下專勅近臣節減浮費人人莫不歡悅臣願 陛下鑒 祖宗儉約之德懲既往虛費之失持今日節減之制不為左右干請而移之宮中非時賜與非今之制者一切不行念生民之勞戒誅剝之令則天下幸甚幸甚

兵連慮危

臣竊以國家自北戎繼好以來大弛武備號曰禁軍者日享厚給驕蹇難用前日魏府之兵是也曰廂軍者例充給役刀矛戟矢略未知名自西羌悖戾征戍屢興再戰再衄覆軍殺將其故何哉臣謂

處將乖宜練軍不實官名不正之所致也處將乖宜者其弊有二一曰將權不專借如諸路帥臣悉委都統之權 朝廷每有 宣命令與鈐轄都監巡檢從長商量或有機宜主帥發謀則人人各出意見議論不一退則相交笑病以此為謀安能決勝此皆將權不專之患也二曰將官不乂臣竊見陝西永興鄜延環慶涇原被邊之郡主帥更易非常一歲之間換三五人為上者知不乂處不肯奮然專行法令居其下者皆知莫能以為我帥不肯稟畏故上下之情不通而誅賞之法不行此將官

不久之患也練軍不實者養無用之兵致難供饋
今邊郡禦戍之兵非人人可戰朝廷遂急招募據
名抽點務多其數邊臣但苦兵寡不計強懦至則
收之以是度之冗食者不可勝數也唐方鎮之兵
不出征討則以本道租賦自贍故選練至精及戰
則無不可戰之人也我太祖太宗朝四方未
一用李漢超何繼筠治滄棣北備匈奴用郭進守
邢州以扞河東於是下蜀取交廣當時西北則守
東南則攻用兵之處比今倍多其時圻甸未廣租
賦未豐其饋運兵軍常足也今天下一統兵戍止

於西北二陞而賦稅百事十倍於當時而嘗苦兵
少及饋運之不繼何也蓋當時用兵之處雖多而
所用之兵養薄則易於供饋今之兵卒多求上軍
投者即收之不暇惜費今一卒可贍昔之三人又
藝能不精愈多愈敗此所以兵多而難贍臣故曰
養無用之卒也三曰官名不正借如諸路帥臣其
官以都部署安撫經略招討爲名是委以都統之
權其將佐曰副都部署鈐轄都監押等均以賓禮
見主帥至於分管兵馬自爲部分非如軍職節級
相轄唯主帥則都管之蓋以都監之名本是監軍

自餘殿直諸司使副皆是內庭之官若令軍禮見主帥則於禮不安若令不相統帥又不可成軍臣故謂官名不正也爲今之策臣請改正官名每路立成一軍如都監之類盡改軍職如遊弈排陳之名也節級相轄一以軍法從事如違犯並依階級條貫施行官名既正則將權可專將權可專則練軍必實練軍必實則所用之兵必寡寡則易於供饋以守則固以戰則勝或朝廷疑其成軍之後其力難制則事平之日分散其權可也于今之計非成軍則無有成功其勢不得不然西寇干紀已歷四年未即

誅翦今不早圖改變設使幽薊少警將何以待之臣故曰兵連慮危者以此

法令必信

臣聞管子曰國之重哭莫重於令令重則君尊君尊則國安故虧令留令非令者皆死無赦是知令之不便不可遽行令之既便不可遽更人君持此柄以運天下者也今朝廷每下詔令尋即變更士民相語期以非久州縣之吏不敢遵行臣請以一事質之自西兵以來陝西科民爲兵京東京西百姓驚擾至於斷指熏目以期苟免其時詔書布諭

安慰京東京西之民示不復黥爲鄉兵今又籍之
矣又陝西河北初黥爲鄉兵詔書諭以防守城池
不復黥墨今又黥手黥面矣此皆朝廷發大號令
告于四方丁寧切至乃首尾相戾如此使民何所
取信哉又如樞密張觀邊臣趙振等數人皆以軍
事不前責降曾未踰年加恩牽復始者無過則不
應譴責若其有過不應寬假爲令若此欲百官畏
服萬民信順難矣願 陛下少紆聖慮思其紛紛
更變之端前令之是則後令之非後令之是則前
令之非察其是非今上御名於出令則朝廷尊而天下安
矣唐文宗曰爲政之道自古所難宰臣李石曰朝
廷法令信則不難也則知古之君臣皆以法令爲
至論耳幸 陛下留意焉

恩賞無私

臣聞天之道不私於物其所以生而所以殺者萬
物無從而歸其所宰故天之道至大矣聖人法天
以至公令天下功則賞過則罰無私焉萬民服矣
朝廷於賞罰之柄有無功而賞者有過而失罰者
臣於前篇論之詳矣然罰不行而賞太過此乃立
法之弊非 陛下之私也臣所謂私者竊聞頃年

有勅旨停罷內降今又行之大凡恩賞固當出於陛下之所決若罷之則是人主都無威權盡悉臣下此則不可也然今之內降或緣婦謁內戚宮中因依僥倖苟求恩寵非陛下擢用英豪旌錄功績故每有內降恩澤人或疑之執政之臣又不能堅持正論以輔盛德徒欲阿順主意不謂於陛下無益也古者水旱不時人君親於南郊以六事自責婦謁盛歟苞苴行歟故婦謁之盛苞苴之行古之深戒今僥倖內降者苟非親戚必因貨賂然後乃請若陛下從而行之是示天下以私也

唐中宗朝宮掖不肅嬪嬙左右出入無節遂至廣納貨賂則別降墨勅斜封授官臧獲屠販之類累居榮秩卒爲禍亂此前世之鑒伏惟陛下揔攬威權抑去私請苟用一賢人出陛下之意雖曰有內降百官萬民相與稱道之不暇孰敢非議也

威福是守

臣聞老聃曰魚不可脫於淵國之利器不可以示人爲人君者深知此務則威福之柄臣下不可得而竊之也威者兵刑而福者恩賞之謂是二者有一失而得於下者其國必危有公然而假於下者

國必亡三代之末齊假於田常晉假於六卿以取其國秦假於趙高而天下潰漢假於外戚而王莽作東京假於強臣而曹丕立魏假於司馬而移祀晉假八王而兵亂宋齊梁皆假於大臣而相繼攘奪唐之中世假於宦官而官闈禍起此皆人主不自揔攬威福而假於下卒至危亡故兵刑官賞之柄雖大臣外戚宗族宦官皆不可假假之則人主失其操持而自取危殆也臣竊見數年以來兩府兩省之官遷轉甚速雖曰循例不限年數趨利之輩日遊權勢獲進者自爲私恩而罷者歸怨於上

臣恐恩賞之柄暗行於下也臣請以一事言之今陛下少有差失之舉則羣臣莫不交口議論期於諫止而大臣權貴之過少有肯言者何哉陛下天慈仁恕每有言事者雖上論聖德然未嘗怒之或論及權臣苟不顯行譴謫則亦陰被退抑而嚮之者皆與進用臣恐大臣權貴之過陛下罕得而知也以此觀之臣下之威過於主上主上之恩行於臣下其勢顛倒未爲得也伏惟陛下躬持兵刑官賞之柄以治天下則百官歸附而恩信行矣

聽斷不疑

臣聞聽與斷二者相資而終始之者也聽者取於衆言言者所見不同或懷私背公或阿順主意故是非紛糾所以人主但務博采兼容而要之斷也斷之爲義時有緩速而理有得失違於理而失於時無術之甚也有中於理而失於時或適於時而違於理其爲患也亦均矣唯適於時而中於理乃曰善斷故聽之道務廣不廣則壅斷之道務審不審則移唯天心仁恕者善聽唯剛果明辨者善斷故曰聽與斷相資而終始者也伏惟 陛下天仁

洪覆包容萬類每日臣僚論事 陛下未嘗不欣納假以溫言使之得盡其說可謂善聽矣然採於衆言時有更易不決然主於斷也臣愚上度天心非不務斷所以未至於斷者蓋慮或有未審故優游不盡斷之之道臣竊謂欲斷之審莫若頻延近侍講議禮要廣接群臣詢訪時事聰明益至處置自精何患斷之不審也易曰天行健君子自強不息聖人法天以剛健決物伏惟 陛下法乾剛之道專決斷之明臨事不疑大隆治道蠢尔小寇復何患乎在 陛下力行而已

太平可致決所施爲

臣聞易曰危者有其安也蓋安危之理無有定分在人君之所爲國危而爲安者自古多矣朝廷自用兵以來屢下詔書詢訪材謀魁傑之士或令近侍各舉所知收用雖久未聞功績灼然者將任之不盡其材歟抑天下無可任者歟謂無賢材則厚誣於世矣漢之興驅馭英雄以成大業皆秦之遺士也唐之興取隋之棄人以安天下故賢者無世無之顧取之用之之道如何尔 陛下當三聖之統紹 祖宗之業宇內之廣生民之衆莫不傾心

端明集九

二十

蔡恭

以期太平願 陛下勞於求賢而佚於任使修明紀綱興行禮教則太平之治其猶指諸掌乎

右臣謹具如前臣奉 詔書許令言 朝廷大事邊防機宜臣所以竭思畢慮論當今之要務伏惟陛下寬恕狂愚特貸誅夷之罪或賜施行又慮臣文字昧暗事理未明臣上殿之時乞賜 清問庶盡臣懇懇之至干冒 天慈臣無任戰懼之至謹具狀奏 聞伏候 勅旨

莆陽居士蔡公文集卷第九

莆陽居士蔡公文集卷第

制誥

中書試三道

金吾衛大將軍除邊鎮節度使制

門下天下之重唯將相之任必在於得人閩外之
專有文武之資乃可以屬事眷茲藩屏控夫朔陲
開府文書董貔貅百萬之衆被邊亭障實耕桑什
伍之人求其遠御之良付以中權之劇厥有成命
告于廣朝具官某沉勇本於天姿練達通於世務
有明敏之智臨機而必決有方厚之質自信而不

端明集一

一

蔡達

疑久歷官聯關揔環衛廉行徼巡之道督刺大衆
之居士旅勅馴寇攘衰止嘗以清閑之宴與之從
容而言亮其忠純授以節制於戲甲兵乃刑之大
軍旅以禮爲先尔其察甘苦而周下情明法令而
一群志又綏封略旌錄勲勞惠愛究於黎元威聲
伸於大漠副茲委用勿懈乃心可

禮部尚書除御史大夫制

門下 朝廷興治之原法制修明爲大內有公卿
臺寺之衆外有牧守方伯之聯察繩其違第次厥
課秦漢而下專委中司祿秩之崇差貳上宰所付

茲重唯才之求具官某服先民之言承名家之學
文章深厚以華於國行實朴茂以充其中歷侍禁
嚴益劭風問嚮居都座嘗典春官傳經決事而甚
明飭躬率下而自正是用獨持朝憲彈肅官師夫
聲利不誅之謂剛端勁不阿之謂直獻議每形於
鯁亮舉邪勿吐於權豪汝服斯猷往勵而屬可

郡國察孝悌力田詔

勅朕念古先聖人極遠慮而垂大法元元之民其
生長也有教育之地故能興行於家力作於墾親
族和同愛足以相恤衣食贍給力足以相保然後

獄訟衰而盜賊息以格於治平嗚呼其盛也哉自
戰國歷秦重利而寡恩孝悌之風薄矜奢而欲廣
墮游之手衆驅人於不善率由是已豈斯民之性
有所偏異蓋導之之具至與不至耳朕居士民之
上夙夜憂勤內盡至誠奉 祖宗而惇族屬外務
朴素却侈用而息煩費思吾人尚本而棄末然而
生齒之衆或戾於教義而困於饑饉者其導之未
至歟今郡國長吏皆朕協力而宣化其有孝悌章
明勤於田畝可率鄉黨者其以名聞朕將錄之以
風天下

右正言直集賢院同修起居注韓絳奏
臣竊見臣僚奏薦文武官頗或所舉無
名所稱不實妄冀朝命以爲私恩伏恐
請托公行重增爵賞之濫此弊不革爲
蠹寔深欲望 聖慈明降 詔書嚴行約
束今後中外臣僚已係擢任苦提點刑
獄已上並不得薦舉如有所舉無名所
稱不實違犯 詔旨並仰御史臺察訪
事由彈奏伏乞重行朝典候 勅旨兼
近年以來中外臣僚奏舉官員內有人

品庸常薦章交上亦有宿負罪累迹狀
醜濫者乞行雪復奉 聖旨令降勅誠勵
勅朕制臨天下思與賢材而共治之故開薦舉之
路又於群臣無有疑問故所薦舉多亦升任然比
年以來或所薦者材資菲薄加之品目下人遠甚
乃有公卿交牘稱道或宿愆醜濫曾非摅註請行
湔復或職任疏遠不稱重輕引援清近迹其本原
豈非造請衒鬻者傍依權門無廉恥之行交結恩
私者苟蔑王爵無公共之志不然何以臻此不知
不賢而言之茲曰蔽繆知其不可而言之茲曰欺

罔左右官師懷此事上嗟予何賴誠心未孚遂致於法朕甚愧焉其令御史臺察訪中外臣僚奏薦如有所舉非其人者立須彈奏必行之罰宜自近始重茲伸警言尚體予意

奉試 制詔二道

頒新定大樂詔

朕聞大樂之作必與政通故周漢隨唐雖有大功盛業咸歷數世然後能考章程諧音律薦宗廟和人神蓋由治定民安格於是道豈苟而已 太祖開立大統循周舊聲議者以朴儼所刊差失和緩脩

緝之際定減一律在 真宗時天下無事游意人文始究隨月轉律之說然去古彌遠歛義散亡善傳經者不知聲音之節能審聲者不知經誼之要二論難一乖刺不合 朕念 祖宗付託之重 功德之美流被韶濩茲其時乎乃命宰執招延儒術叅校前失期於必中今唯羣公條上所定大樂以謂約度於古以爲器定聲於器以成音上可以奉祭祀下可以協家邦垂之經久爲萬世法 朕德不至獲茲嘉况慄慄在懷靡忘歎尚故茲詔示想宜知悉 求安撫防秋將士詔

勅防秋將士等 朕念疆圉之重生民賴之非果
毅貔虎之材不能禦外虞非淹遲歲月之久不能
練邊事汝等向遣戍防屬以蔽扞將謀沈遠有綏
撫之策士心堅執有奮擊之銳法令行於中威聲
出於外故使亭鄣徹警言耕桑樂業皆汝等之効也
方今天地變肅河隍早寒晝烽夜柝有行役之勤
引弓飛鏑有瘡疥之患或疾而鮮藥石方寢而犯
風霜至於重客寄而念室家觀天物而感時節想
多興嘆動于乃懷嗟乎守在四夷載橐橐弓矢聞於
往載 朕甚愧焉然而旌賞忠勞期於必信尔其

自力稱 朕意焉秋涼汝等各好在遣此不多及
廣南轉運使元絳奏南海洪聖廣利王
獠賊至廣州城下官吏等屢禱有應乞
加崇顯之號奉 聖旨特封昭順王制

勅易載害盈益謙之旨蓋神道正直必有輔於教
也厥有陰相吾民沮遏兇醜應荅明白不列美稱
曷以揚神之休南海洪聖廣利王唯王廟食尊爵
表于炎區年既遠矣唐韓愈記稱神次最貴且有
福禍之驗國家秩禮祀等尤高康定中朕嘗增王
徽名牲幣器數罔不稱是今轉運使絳言迺者儂

獠狂悖暴集三水中流颺起身留三日逮至城圍
廣已守備火攻甚急大風還燄閉關渴飲澍雨而
足變怪屢見賊懼迺逐州人咸曰王其恤我者耶
朕念顯靈佐順靡德不酬其加王以昭順之號神
其歆茲顯寵萬有千載永庇南服

廣南東西十一路轉運使提點刑獄揀
放配軍勅

勅朕臨馭海內念憂元元冒以至仁期於遂性比
因郊祀赦宥辟刑顧惟羈隸之人特解錮留之
負或能悛省不仍舊惡者選移便地或加癯老不
能自力者去籍遣原列郡守符監司使傳悉心按
視以稱朕懷

呂士宗男克禮試祕省

以尔父久歷煩使方茲引年命汝以官往試祕省
夫仕官善歸而嗣子有祿始終之典可謂厚矣汝
其勉勵以稱恩寵

徐介張倜並著作佐郎

勅國家爵賞之設以待材賢計利遷官殊非本意
然殿則有罪而取或不遷又非所以馭吏之法也
尔等並緣保薦分幹權利校課所當宜在陟典夫

先中文詞之科今列撰述之局其資甚茂尔其勉之

成端夫奉禮郎

勅具官坐黑主奪官理宜廢棄屢更歲月或能省循叙還京司實爲恩渥勉新刷故以務後圖

田京工部郎中依前知滄州

勅具官迺者大河之北遭罹水患板戶貧困冗散旁郡朕甚愍焉屢敕所部每加矜恤人情懷土而未聞還集汝京所守濱海都會襟帶之固兵師所聚而能上體予懷下究民隱申慰勞來歸占者衆使者條狀願爲褒異文昌草議起部要司命汝踐之用爲增秩夫計功實與累日月而遷者固有異矣汝念此意撫安吾人可

李絢男秬特授太常寺太祝男秬將作監主簿

勅某官某男某等朕念乃父早中科遷以文華深厚而居詞命之職以材智敏明而付浩穰之治方膺外補奄尔淪逝錄其嗣子以伸予懷或遷與禮臺或麗名匠寺並爲優寵勉自進修

田九思太子中舍致仕宋象國子監丞

致仕

勅具官尔等以歷州縣願還官政念其退止宜伸
恩典或進與官坊或叅名庠序持此以歸示於閭
里亦足以爲光榮也

胡可充翰林侍讀學士仍舊判銓

勅朕念君人者左右前後皆正人則諷諭顧問之
間莫不循於治道故侍從之臣必在精擇而況勸
學之職尤其重者自非飭躬端今上御名濟以文業則不
與其選也具官某勁清有守臨事不回記問該閎
屬詞精敏久居禁掖日有嘉稱今命尔以金華之

端明集十

七

蔡承忠

要尔其考聖人之言覽前史之載有以發智慮之
明作安危之鑑者附當世之事而爲朕論之使授
受之際謂之得人豈不美歟

何 充龍圖閣直學士知秦州

勅朕惟關陝之右冀門爲重內宿兵師百萬之衆
有政令之決外連羗夷千里之遠有綏懷之略必
欲恩威行而士伍服信義著而種落附非有文武
之資者不可以輕授具官某尔以文雅中詞科以
智敏被器使典訓誥之職而復於深厚歷官守之
政而濟之果斷會秦闕帥今上御名擇其人唯汝之能斯

可往治輟自禁垣之要增以內閣之嚴若夫入叅侍從之聯出委藩翰之寄士林華選爾實兼之隴道之雄爲天下首謀訓綏輯控制外虞使朕無西顧之慮者爾其望也勉懋勲績以稱休命

褚士言王世範並大理寺丞

勅具官某等天下郡縣之吏其負以千萬數材之與否莫可周知唯監司長吏以善狀保薦者則校閱閱而升獎之以勵能者爾等効官有勞而舉者又以連罪爲任往承棘寺並爲優陟夙夜思省以答茂恩

李君俞授大理評事

勅使汝爲倉庾之吏而粟不可食奪免一官以戒不職今所監之司皆曰向以西事應猝便辦蓋無它腸又所輸粟移之秣飼厥數不減屢更郊赦之澤請還京寺之僚吾其從之爾當自省

郝周授太子中舍致仕

勅具官某受吾俸祿驅馳州縣至於衰老今其歸也可不念其力乎遷與儲坊爲爾光寵

未復舊官人內殿崇班李昭素復內殿承制

勅某官汝嘗失刑民死非罪奪官既久省咎則多復禁省之舊聯實朝家之優渥勉遵成憲勿蹈前爲

侯宗亮授西上閤門副使

勅具官某帝者日臨法宮以朝群臣宴御便坐以講庶務臚傳辭令之美贊相規儀之多二閣之權允司其事予欲擇其能者非敦良敏茂之人莫能勝其任也以尔某姿性格毅器質淵通周旋軒陛之間屢更寒暑之變宣納夙夜罔有不勤出入禁嚴罔有不^{今上御名}叙尔績効進貳使名朕左右之人所藉者雖衆要近之職得與者無幾汝益修勵以稱寵靈

趙偕著作佐郎范孝思大理寺丞

勅具官某等郡縣之下勤勞職事歲考滋久而能^{今上御名}檢操履爲保任所知者朕嘗與進用以勸焉尔等咸有吏資著于銓筦條列績闕當於陟典或叅秘丘之選或進理寺之名各服寵章益劭來効

故太府卿畢世長男從益將作監主簿

勅具官某男某以蔭入仕采歷年所進列卿位屢更藩翰因其淪逝閱其子姓一門之內咸列官簿

然恤孤之典朕乃不忘唯爾從益頃試匠寺今與
即真爾毋不勤以墜寵命

薛讓內殿崇班

勅具官某向以馳駟邊障將命往還旣涉歲時不
亦勞止升聯殿陞視秩朝闈茲爲褒渥之隆用勗
官成之効往欽爾次無怠厥修

閻旦國子監丞致仕

勅具官某占名中銓逮于暮齒謝還官政退休其
家念爾知止進丞上庠往服茂恩以安汝志

武日宣贈忠州刺史

勅具官某綏懷之德不及蠻獠至使拔其種類寇
鈔嶺外徑趨清海鋒氣尚銳爾唯邏巡之職實司
翦捕而能忠果挺志勇毅自奮身先士伍轉戰不
已兵力失利沒於鬪格遠聞予聽終夕悼惻特推
恤典列於刺部忠魂如在歆此哀寵

曹觀贈太常少卿趙師旦贈光祿少卿

五嶺之表面內以來南捷海澨西屬蠻峒未嘗有
鳴桴之警故守封之臣幸其無事莫爲戰備迺者
獠衆猖悖乘襲疆場爾等並分符竹對典州郡當
賊鋒銳忘身殉國嗟乎城池不足以爲固甲兵不

足以爲衛陷於非命傷惻良甚恤恩之厚並貳卿
列汝其有知承朕此意

董玉等贈禮賓使趙允明等贈作坊使
勅具官國家設警巡之職用以誅磔寇盜撫安人
民有能死其官者朕嘗旌異追進名爵收錄子孫
所以表忠義也蠻方猾橫弄兵嶠外尔等咸以忠
勇疾憤狂寇擊刺襲躡遭罹不幸朕爲人父母而
使汝等身膏草野妻孥望祭方里之外心焉哀惻
其何已耶特寵使名以慰幽路靈其不泯歆我嘉命
葺用和贈內殿承制張兀等贈內殿崇班

勅具官有生而死磨滅者衆唯忠魂義烈雖沒不
亡汝等參於裨校往捕寇攘矢石之間殞其軀命
朕心哀愍特優恩恤追榮近墀賁終幽窆冀尔靈
魄享是嘉寵

劉晃贈贊善大夫李稹贈光祿寺丞

勅具官某等並爲嶺外州縣之吏屬以蠻峒搖蠱
毒我列郡恃兵跳梁殺辱紳笏汝等並懷忠節捨
生不屈朕惻然義之特行哀恤追褒宮室榮贈京
司靈其歆之良慰汝志

張茂實節度觀察留後

馬軍副都
指揮使

天下之本在於京師而辰極之下必有材勇之士
居則拱扈威蹕出則番戍外圍分建三帥以治其
政茲率典故厥惟舊矣今予有百千萬數精銳熊
虎之衆曾是強毅有能爲予訓忠義之節明法令
之禁者吾其用之具官某有沈敏之才通夫將略
有謹厚之行達于予聞擢領萃屯翊侍軒陛惟時
蚤夜罔違靖恭遷兩使留務之名總萬騎選鋒之
勝車申符籍尔則專之噫以嚴一衆其術匪難服
于衆心其道匪易平直無頗情乃上貢廉明不撓
惠乃下究委注惟重欽哉惟承

王凱殿前都虞候王達馬軍都虞候

勅國家列三帥以治拱扈之師設虞度以貳董齊
之政非有沉武之資敦信之實者無以條理尺籍
嚴威環衛朕嘗於是擇而任焉具官用之邊圉敢
於戰格而服其士伍遣之戎禦奮其材勇而聲在
戎漠咸以勲績分提禁旅藉其能力尚處疆陲升
陪殿陛之崇佐護騎屯之次候奄至重倚信彌親
尔其下達於衆情上裨於長政恭勤一志毋懈厥初

韓絳右正言

勅具官某百執事各修其政而諫諍之臣得與國

論其職要其責重故難其人先朝命置六員而終不克備朕每擇是官必沉慮久之而後行信乎其人之難得也惟爾絳擢在高第屢更哭器使執心方勁落落自立今易處西省往備諫列若夫罷軟而畏權要附阿以希進用激訐以干譽煩碎以欺俗有一于此茲謂壬人術學通於大體言議中於至理弼違箴闕以輔不逮知而必爲靡悼後患有出于此茲謂正士予期汝絳作予正士可不懋哉

申房漳州錄事參軍監京山稅

勅具官某向治征筦取日有勞督諸曹於外邦商美利於劇邑關市之務本以察幾爾屢爲之母或苛燒

諸葛實知揚子縣韓鉞即墨縣令

縣道之設尉屏兇盜而護善人所以助令興治者也空官有罰敕職有賞而勸沮行焉爾等捕除攘奪咸應遷格或試秘省分治劇邑有民有社可以爲政勉懋平直以稱褒典

李宣德大理評事致仕

勅具官某士之壯則從王事老而歸則教鄉黨未嘗不爲善以助治也汝掾于劇郡逮於暮齒願還

官政引卧丘樊遷丞京司以需朝渥尔之仕與歸亦有助於治歟可

何中立男景先將作監丞

勅具官某男某以尔父輟自禁垣往帥邊服在注倚之尤重必寵數以兼優爰露奏封請任其子命丞工監之列用爲侍從之華勉勵清修以永多慶

范仲淹男純粹等四人授將作監主簿

勅故資政殿學士戶部尚書范某男純粹等仲淹素竭忠力勤勞王家不克永年奄尔淪逝嗟其材賢不可見已並錄子姓逮於族親或列名京僚或

試秩監省始終之典予唯不忘清白之訓尔宜自勉

范仲淹外孫賈公直試將作監主簿

勅某朕以仲淹勤勞王家忠義一節奄爾淪謝悼于予衷錄其外姻試秩監省勉思所立毋忝異恩

李守寧劉汝翼並監酒稅

郡督郵之任蓋所以紀綱政治糾司過忒唯強明幹敏者乃可爲之以汝等嘗歷諸曹復有歲宦寵以都掾之目泣于征權之局夙夜思今上御名毋空厥官

王礪開封府判官孫錫開封府推官

勅具官某等材不敏明不能決穰劇志不強果不

能糾豪勢法令不通不能繩姦吏賦役不均不能恤百姓予惟京府之職嘗患四者之難故求其人以貳尹政以尔礪雅有吏資嘗參憲職試能茲又恢然餘裕以尔錫麗名詞館平覆刑書將歷要塗必更幹任並佐浩繁之治且觀贊助之方服予訓言以竭忠力

徐起光祿卿知兗州

勅具官某趙魏之域爲天下重宿兵聚粟以鉅萬計汝起鄆爲使者將漕鄰部輸置金繒以濟湏給嘗以陟典減從近歲特推朝渥乃正卿秩宰膳之寄尤爲嚴近勉圖績効以稱嘉寵

李先轉職方員外郎

勅具官某爵賞之貴以馭于下凡與遷進必校勞實以尔嘗歷臺署往涖民政積移歲筦居有功闕在法應陟予何嗇焉郎等唯三乃踐前列往膺褒進益懋勤力

曹穎叔充天章閣待制知福州

勅朕念善爲維持之策者運天下如臂使指欲其大小相臨而威令必達故也東南之郡長樂都會表山環海地險而遠八州生衆繫乎總帥非有幹

明之資能辦吾事者不可以遣具官某智力精敏應幾必決荐更器任籍有聲稱將漕益部還貳計省而猥繁之務罔不給肅今屬以方面之重寵以延閣之華尔其繕除兵械補完城堞懷綏困窮翦遏兇猾使吾人無愁苦之嘆朝家有剽倚之賴朕志唯是尔儀圖之

張昇充龍圖閣直學士知秦州

勅侍從之臣雖出撫方面每被美名以爲光寵況內閣之重苟非耆儒厚德或材通器任者不足與也具官某方嚴出於天性識慮成於學術向在臺省有鯁亮之稱逮臨邊圉有綏靖之略朕念其翼門鉅屏羗夷雜處板戶繁富軍旅屯萃今升以秘圖之職屬以隴道之事汝久泣戎政備體忠力無復多訓尚服休命

郭申錫侍御史

勅郭申錫御史府之職正紀綱繩愆繆外以肅官師內以獻忠謹名爲清要固難其才朕向令近臣保薦庶乎得人知雜御史擇行以尔申錫塞詔擢自郎署之列往膺柱史之任汝有鯁正之志精通之議必竭尔慮以達予聞

趙琪宋詢並特授尚書屯田員外郎
勅具官某國家遇官人者之意甚厚凡三歲則比
其殿最按其所當而升黜之其間雖無較然治狀
之明而能廉今上御名自守者亦不遺也尔等監視州郡
或臨縣邑計年應法用遷尔秩郎官清列推重於
世咸務修勉以稱恩渥

劉宗旦授錄事參軍監酒

勅具官某汝尉于縣而能擒誅寇盜謹敕其職攸
司考課當乎賞等升郡紀綱往臨權酷自力來績
以報甄錄之異也

韓周內殿崇班

勅具官某堡鄣之任刺視疆境護防居人幹謹其
事逮夫三歲斯亦勞矣遷與禁墀之列通聯朝著
之榮虔思茂恩以立來効

高允元授供備庫副使

勅具官某祗事內庭素尚忠謹濱延歲筦益著勞
能使介之名禁墀尤重特推渥澤俾進榮班勉敦
夙夜之勤庶荷褒遷之寵

張白大理寺丞致仕

勅具官某向從祿仕謹身無咎今謝官政推恩唯

厚讞刑之秩顯於京曹被榮而歸寵尔衰暮

程戡充端明殿學士知益州

朕撫馭寓內恃之久安使上澤周達遠情不壅者
蓋有賢能為予鎮守方面尔蜀道天險劍外遼絕
每委帥臣俾之專決列城側首以承教令今之借
威權託心腹者無與為比其於選豈輕也哉其官
某以文中高科以材任煩使入居憲臺而豪貴斂
迹往臨藩翰而孤惇蒙福迴翔禁近號為恭今上獻御名
納謀議關於機宥升榮秘殿分寄益部形勝繇俗
汝嘗知之夫以刑制民畏而不戴寬恤征賦使之

便安予尔賴焉尔其勉力

沈惟恭遥郡刺史

勅某官某刺部之雄在古尤重今雖遥制必勲勤
戚舊者然後命之以尔早由武材久處禁職間有
疇勞之舉與其滿歲而遷申復朝恩俾司郡契益
思勉茂用對寵靈

石中立孫祖冲試監簿

進祖文集

某人唯尔祖中立嚮以文儒參與政柄忠朴淳謹
為益良厚而其淪逝之日既久尔能纂緝遺篇削
藁來上追念曩輔惻然不忘京監開榮用顯存没

尔宜修勵無忝茂恩

王璪屯田員外郎

勅具官某尔在邊帥莫府旣以材智贊其方略又以經營儲粟備辦豐實按格所當宜有遷陟文昌郎位爲仕清選用疇尔績恩澤甚茂勉務來効以荅褒進

賈德明都承旨

勅具官某等樞宥之府所承稟而宣行者皆禁密之資加肅給之敏麗名機務實唯勞舊按其資歷擢揔綱領勉思勤盡尚副褒寵

端明集十

十九

昌

張繼渥承旨

勅某人蚤以材敏屬麗樞庭積延歲月之勞益敦夙夜之恪進承旨命特示寵榮祇荷恩遷愈罄誠志

毋湜侍御史

勅具官某帝者嘗欲達聰明于外而與議者重於得人士大夫嘗欲獻可否於上而抱材者難於得位朕侍臣拱辰言尔湜端方有學子可以備憲臺之職擢自郎署典于柱史尔以儒進當通理道之要歷更外使固知世務之本繩違正失罔戾厥中服

命惟虔益懌而志

皇兄承幹贈節度使追封蕭國公

勅朕嘗覽前史天子之宗族有博良之行終始顯榮者固已稱歎況予弟兄躬是賢德存則接以恩禮歿則伸於哀祔所以勵於本支而儀于天下具官某承流慶源毓稟善性持信厚之誠而表於屬籍竭忠盡之尚而壯于藩翰歷年不永奄罹殞逝臨酹傷惻特加愍贈飾以齋鉞之重躋夫公衮之列靈其不昧歆是休命

皇姪孫世崇贈防禦使追封侯

勅帝道尚親所以廣恩而推愛也朕於宗籍惇睦良厚其有殞奪每加褒典具官某貴聯天屬躬蹈義訓飾行有恭靖之美嚮學有沈敏之善已叅環尹久奉禁朝遽此云亡予實汝惻進扞防之使絃仍䟽啓於侯封營魂有知尚歆榮渥

任達濟州司馬致仕

勅某官向臨征筦之局妄加刑罰於人在法所當奪官而廢憫其老疾特示寬優方州典午之曹憲臺柱史之日率爲兼老宜體厚恩

皇姪從質贈觀察使

朕念至治之主本於仁愛內澤宗族以化於下矧
予兄弟之子親於屬籍年不克永朕甚悼焉具官
某忠恪以立朝信厚以行己久更環衛荐歷歲月
休有令善著于群聽今其殞逝重以優恤增廉使
之秩啓侯社之封飾終之恩於斯為厚唯汝之靈
歆是嘉寵

莆陽居士蔡公文集卷第十

莆陽居士蔡公文集卷第十一

制誥

李樞供備庫副使

勅某官獠衆弗順寇鈔嶠南州郡用兵調發饋給
尔爲使者循行往來按視良苦升榮禁闥就總戎
鈐勉圖茂勲思對優寵

王塾衛尉寺丞

勅具官某國家邊陲之事必以兵師伸其威武然
儲峙食粟務於流衍使者以尔勤力收斂補於輓
漕升榮京案圖厥勞効勉勵尔志以答恩渥

端明集十一

一

蔡共

李宗儒可內殿承制

勅具官某尔以武材往涖邊堡種落懷附斥候甚
明眷言帥臣遠形需奏特升聯於殿陛俾輝寵於
塞垣勿忘欽承勉立來効

葉均可大理寺丞

具官某官賞之法所以磨勵世俗旌拔賢材然有
勞而陟與累日而得者差異也尔治劇務復積歲
功於格應遷命丞理寺勉修成業以稱寵靈

司馬京可衛尉寺丞

監秦州在城酒

專堯利資以佐公上必用廉飭乃有羨贏計課應

遷京曹是踐勉尚修勵祇荷恩褒

范祥追官知州

勅具官某尔爲使者權泣冀門建言羗酋願上土壤國家不贏尺地之得尚安遠人之歸再屬經圖務存久靜尔深陳便利堅請完修但知開劃之勤殊失預備之策致茲寇盜乘隙鈔攘興戎之端厥咎孰執奪去一秩典臨外州實爲寬矜勿忘循省克棟可右衛大將軍

勅帝者宗屬唯是飭愿自守其履尚固可嘉矣況乎潛心經術發揮詞業不有恩數之厚曷以勸示來者具官某植性端靖顓務師學屢形章牘願較藝文給試禁署預列名等特遷環衛之重以躋替古之効益思爲善以對光寵

李評殿中丞宋敏脩太常博士楊慥奉

禮郎

逐人學士試到奉聖旨與轉官

勅具官某等天下以文治而士人以詞進者爲日舊矣唯尔評生於貴戚早聞善訓綴學屬文特然有立敏脩暨慥世以儒聞能名其家經術益茂命試列等粲然可觀或遷殿省之聯或與奉常之列率爲恩渥勉務敦修

皇姪宗道贈觀察使追封侯

勅博睦至親故事之重褒顯令德治道之先矧唯宗藩之亡宜有哀禭之賁具官某知爲善之樂篤好學之心棣跗承上以光華麟定應時而信厚又司環列之重遙總州兵之雄天奪厥齡予深其悼命以觀風之秩徹茲書社之榮冀汝英靈歆此悲寵
甘昭吉特授文思副使
勅具官某性質溫茂材資幹明又參省戶之嚴仍寄帳兵之信服勞益謹第課應遷優陟使聯用推朝渥勉敦尔志以永厥成

鄭紆可職方員外郎馮炳殿中丞

勅具官某等向以狂獠肆毒嶺嶠之南臨遣帥臣往殄兇醜尔等皆以材敏實從征行還上功次之條宜有遷褒之澤序升郎位擢與省丞並爲恩榮勉務修飭

余仲荀可太常寺太祝

勅具官某等向遣樞臣平定戎寇還上功狀之實悉紀驅馳之勞尔等咸以材能嘗與軍事或進秘丘之列或升禮寺之華勉圖修進以對光寵
梁惟一可大將軍致仕

勅具官某天資粹謹材幹敏明久參宸內之聯比
嘗任使之劇日親藥劑屢易歲華備陳懇實之詞
願解信要之職擢於環尹俾遂家居終始之榮汝
其至矣

許士廉太子中舍依舊知梅州

勅具官某百粵之壤風土異宜尔分守符實處嶠
外積勞累歲具于有司最要之凡合於遷格進陪
宮案仍泣方州祇荷寵榮勿忘省飭

皇后妹仲翹新婦特封鉅鹿郡君

勅樞縵紀節茲乃慶辰綸渙推恩厥惟舊典矧乃
后宮之戚宜推湯賦之華某挺生慶門早服柔範
動靜鑒於圖史夙夜謹於絃緹嬪于宗英著厥閨
則宜徹郡田之號益峻封君之榮思懋懿恭用欽
寵數

貴妃妹封清河郡君

誕慶遘辰睦姻疏寵眷惟妃位之重願推女弟之
恩舊典具存明命斯允某生高華之族稟茂淑之
姿遵姆教而其嚴奉閨儀而愈今上御名親爲外戚陪嘉
節之祝延地啓名邦峻封君之等數宜欽優渥益
荷顯榮

王用西京左藏庫副使張玉內殿崇班
勅具官某等前遣專帥平定狂獠還列功次第推
恩賞近因振旅引對便坐陣行分合而中法士伍
擊刺而奮勇再遷使秩或承制旨並為旌寵宜楙
忠力

兩府兩制聖節奏弟姪京官或試監簿
誕慶之節公卿在位抃呼稱壽罔不和悅朕嘉與
近侍共樂無疆恩于而家用為榮寵命尔京秩漸
于官政力圖德業毋懈夙夜

宰相叅政樞密聖節奏薦子孫各京官

近以慶誕嘉節唯一二弼輔之臣奉觴以上千萬
歲壽誠悃精至詩不云乎無德不報乃以保任之
法除子孫官列于京司所以彰朕之意而登尔於
仕也可不楙哉

武世長于可久並內殿崇班

尔等陪屬宥府幹敏著稱從征南方復主符籍以
謹密歲年之舊加驅馳戎馬之勞積是取成宜推
渥澤升聯殿陞傳奉旨辭甄獎之華往服予命

林詢贈大理寺丞

頃者盜起南服震驚朕衆汝掾州郡遭罹非命盡

忠隕首誠節可尚讞刑之秩用賁幽宥可

允迪長女錢隆禎妻封郡君

慶毓嘉節率均恩渥矧惟宗藩之遊藐焉息女之
愛形于薦引當列封號徹名邦之華壤厚敦族之
懿典褒與之重尔宜欽奉

唐中和可內殿崇班

勅具官某蜀險而遠欲以知風謠情狀者必擇明
曉事機之人乘駟往來以通道上下之意奔走三
載厥惟勞止比其還歸宜有叙進殿墀之峻朝紱
之重尔宜勉力以報優獎

端明集二一

六

信

孫沔可樞密副使

朕念上承宗社之大下撫人民之衆其出命令治
綱紀者唯一二弼輔之臣而已所以夙夜思慮敷
求俊賢矧茲宥密之嚴專治兵夷之劇苟明不足
以知王體才不足以辦吾事者其可用之耶具官
某以文業進身而能果自任智略如車輻之湊論
議若泉源之流當居諫垣號爲鯁亮逮叅延閣屢
更器使頃年羌戎懷貳邊疆多故將漕關中有轉
流之術鎮臨塞下有威懷之稱班旋于外夷曠一
心近以峒獠肆狂嶺服騷動寇勢莫遏民愁不聊

特輟冀門之行往當邕管之事果與策謀之勝仍親行陣之危天威一伸兇醜大潰比旋師旅願謝官榮蓋寵故鄉之歸命治全吳之重蔽自朕志還貳樞庭擇材任官時議惟允噫萬兵之衆在乎區處四夷之遠在乎撫定尔其深惟眷賴益勵忠力交修不及輔成大務將朕有知人之明而尔有濟時之美可不勉哉

解賓王男遵試祕書省校書郎

勅男某以尔父輟自計府將漕于外引援恩典推延子性命試祕丘之秩用爲使者之寵益務修飭

以對褒渥

王仁旭起復雲麾將軍

勅三年之喪不從政所以明子道之本金革之事卒哭而不避所以著臣節之大故恩以伸愛義以奪情禮有從權蓋不獲已而爲之也具官某世風紹於前人武略長於馭衆處方郡扞防之重屬邊圉總護之雄屯萃肅齊候鄣嚴靖奄羅家禍求解兵麾念門內之治則必志難從遏塞下之虞則匪材弗克宜節棘藥之戚勉循墨衰之行苟忠尚之不忘亦孝誠之已著體茲眷賴往服訓言

蔡準可祕書丞知秀州嘉興縣

勅具官某三歲一考吏治績狀有材廉之稱無失
繆之舉者從而遷之所以勗勵來者以尔業文中
科佐著作局歷官清白嘉有能最即承舊省仍涖
大邑勉隆政迹以荷褒寵

吳幾復可大理寺丞依前國子監說書
庠序之設所以起風化而養賢材也其於訓導講
說尤難其人故業官遷秩差異常等以尔幾復善
談經術甫更再歲薦任交上當夫陟典與名理官
蓋寵優次勉懷儒尚用荷邦榮

端明集十一

八

劉達

張玉盧政並供備庫使

具官某等自二廣平定以來完修城郭增繕器械
屯宿兵防保綏邊圉以尔等材武沈毅志尚驍果
即正使聯之重往涖軍鈐之政務存遠略以靖遐
服寵渥之數宜勉成効

齊暉可大理寺詳斷官

勅具官某國家興定百年事爲之制四方守吏一
法爲治中都官寺刑書所聚持平處議當表天下
尔以材資又被薦引叅試具獄咸中準程遷榮祕
丘仍居理讞文同而比異令具而犯輕勉是審詳

詳以副欽恤可

張友賢可大理寺丞

向繇銓選作掾京府周歲敕職議法平直薦任交上援比遷格升名讞理之秩仍處屬曹且之列益思勤盡以答甄獎

楊京可著作佐郎

勅具官某邊陲互市之局不唯籠利以助資費蓋於輕重務得其要尔居是官既亦三歲收括餘羨第在遷賞祕省清秩用爲疇勞愈虔乃心勉尚修立

端明集十一

九

蔡忠

選人授錄事參軍監茶場

勅具官某等摘山之利歲資支計其數百萬然而涖局者因循至有貨居而不行滯留日久有司請寬資限博取材幹以辦其事銓選尔曹以塞朝旨進以州掾之秩往臨筦權之務勉尚廉敏賞豈吝哉

勾勉監果州商稅

勅具官某以貲入官未更職任而能果勇自力捕除寇盜比援遷格宜被甄獎試僚京秩序次縣章仍臨征筦之繁益懋廉能之最

于壽差勘臨朐縣令張師尹進狀冤枉
于壽奏案入閑詞譏詆朝政降太子中允
具官某以明經中遷治邑効官承監司之符文鞫
部令之冤訴證逮在遠時月其延輒恣瀾詞編著
具獄始覽奏墮嗟其易心及茲問狀之來弥見得
情之實寘于法議宜在嚴科屏之仕途用懲狃妄
尚念前王之德或恕狂夫之言止降宮坊之聯尚
臨征筦之局體予寬大益自省修

楊愈可太子中允

勅具官某吏繇銓筦而進者皆先以閎閱達于予
聽慮失一士周旋申覆然後處其進退便坐呼引
視按材品乃決其事凡脫州縣之職登京司之列
如是之難尔其日思茂恩益修業履

宗績等新婦一十二人並封郡縣君

尔等淑惠秉心柔明遵禮挺生華族嬪偶宗英益
修婦道之嚴式表閨儀之重屬茲誕慶舉于大宗
特推䟽邑之封用獎宜家之美勉終賢範茂對
朝恩

孫奕知通利軍

澶州通判日刈到莛草
四百萬轉運使乞酬獎

與轉
官

勅某官書曰德懋懋官功懋懋賞今之疇勞以官誠與古異然有勞而遷於計歲月而例循資級者尚有勸焉以尔向爲監郡瀕於大河刈聚捷薪餘四百万陞與郎位典刺軍壘

張唐民著作佐郎張暹龍大理寺丞

勅具官某等凡職于州縣者去朝廷遠甚故責之上官以設保任之科關之銓筦以條功實之取審察能不口而後遷焉者歲餘百人不爲不多然漸而器使益難其才以尔文藻温瞻吏資敏明陞與京曹用勸能者益圖績効以稱予擇才之意

端明集十一

十一

蔡達

文恭祖可右贊善大夫

勅具官某以尔父嘗秉政鈞出臨方面藉其材智往于邊陲眷嗣子之克家叅京曹之著位寵陞儲案仍易服章推示隆恩用光慶閤楹修業履益紹顯榮

紀德轉儀鸞使

勅具官某向以夷獠弄兵邊圉被寇躬率士伍力當戰鋒雖翦逐於兇渠亦彫殞其嗣子眷言材勇宜被恩榮遷正使聯用疇功取勉圖來効毋怠忠勤

田武授儀鸞使

勅具官某選自武材往監軍治練習邊疆之事通
知士伍之情眷惟帥臣屢形奏牘任其幹辦許以
精勤特遷幄帟之聯仍處兵戎之務勉圖忠効用
荅寵靈

胡旦贈工部侍郎

勅治道出於人文唯儒者爲能通而行之故世主
右贊以風天下國家發揮神化招徠樸茂挾經術
騁詞章者蛻巖野而都卿相生享顯榮歿有祿贈
可謂重矣具官某該貫百氏之言而藻思雄瞻首
中科選旋升禁掖以材自名聲蓋人上秋逸之驥
躑躅中路晚以病退著書見世今聞嗣續彫落旅
魂未安已敕守臣給力喪事仍以文昌貳卿申賁
泉壤嗟尔不泯其少慰哉

錢師回授皇城副使

勅具官某材幹敏邵智略精明典符方州總兵江
峽民俗安靖疆陲協寧逮茲還朝仍列禁省迹其
功闕之寡陟于城雉之聯益尚清修勉立來効

呂公弼充龍圖閣直學士知瀛州

勅朝廷都汴而燕趙之郊制控北道河間尤爲要

地今雖邊圉晏清然於遠馭之策屯敢勇之士蓄
犀利之器以爲蔽捍委之儒將苟非智略通敏燭
見事機疇可以任具官某出於相門挺然有立持
身遠於權利從政達於治經踐歷滋深風稱甚美
頃以遣臨河朔之重遂升延閣之華省徂以集散
亡流粟以資支計列城謹於備禦部吏悚於嚴明
逮茲罷還間嘗諮訪遷河圖之近綴總帥幕於故
關風俗所安兵民所賴皆尔周悉豈煩訓言

吳育復資政殿學士知陝州

勅近侍之臣嘗更二府以叅國論有補於時者朕

每念之不忘于心具官某文業深厚顯于當世才
劭端敏貳于政幾進謀獻道蔚爲巖廟之器官仁
流化屢更屏翰之職向者甫畢家難俾處經筵庶
乎諮詢日聞謹議遽形剡奏願就宴閑遂兼麗正
之名仍涖憲臺之重悉還舊秩分治要藩抑予尔
思勿憚煩於事任

姚吉甫知廣州清遠縣事

勅具官某頃以薦任分宰邑封爰滿歲成復從銓
調奉賓游於幙府宣上化於吾人勉治政經庶光
朝寵

宋航監鄆州竹家渡

勅具官某近監司具章以尔資材罷軟年力衰暮
庾氏之職亦莫能集尚念服勞之久更臨濟涉之
務益自奮厲無或空慮

李士隆授濟州任城尉與萬戶請受

勅具官某尉能除盜時乃修官格有叙勞茲用推
賞易居近邑增畀奉泉勉圖敕職之勤益荷懋功
之美

陳世京孫有孚石城並著作佐郎

勅具官某早籍吏資遠宣邑治唯土風之尤異弥

歲月以甚勤契傳銓程當正遷格宜與蘭臺之集
用欽綸渙之華益務惇修毋忝褒命

任中師外甥江景倫試監簿

勅具官某以尔外舅嘗貳機衡休有善狀唯其子
姓克荷家聲緝綴遺文薦于乙覽追思德舊恤及
親聯列於工監之名表乃朝恩之渥

錢公紀大理寺丞充刑部檢法官

勅具官某天下所以正民之失者共三尺法耳而
秋官考讞尤為四方所則其屬官非有敏明之資
罔克勝任以尔文華中選兼著史稱覆閱科典既

亦游歲就遷京寺仍處舊治往敕厥職勿懈乃心
都宗范皇甫望並授大理寺丞

勅具官某京司之官職任皆要與其名列必有材
選今雖兼授於外然自銓筦而進詳擇尤重以尔
等或班教條於縣道或正綱紀於郡部咸有勤稱
中于遷格往丞廷尉恩渥甚茂尔宜飭勵毋或
少懈

明袞楊崧並授大理寺丞

勅具官某出於儒族久贊宿筭壽居多保任之文休
有闕閱之取吏資兼敏銓覈中程陟京寺以開榮
眷朝恩而甚茂勉修身檢益劭世風

端明集十一

十五

茂

田況可禮部侍郎充三司使

勅郊廟之禮官師之廩內以贍万旅外以通四夷
經入此其費歲鉅萬億予有近列試總大計推本儒
術辦益邦賦即拜真命僉言茲允具官某文業華
敏屢中科選經誼精博蚤奉策對踐歷諫署規箴
有直亮之節延登詞禁典訓有深厚之體周旋清
密卓尔端勁懷綏藩圉蔚然材略向繇全蜀還司
會府孚予仁心而圖可久之利周國支用而削無
名之斂迹其風稱朕甚嘉焉遷正使名序進官秩

屬委弥重汝無憚煩可

李澄可內殿崇班

勅具官某才兼武幹名列禁嚴按取要於攸司宜
進遷於厥秩往聯文陛特視通閨母替夙夜之勤
以對寵靈之茂

王利涉除率府副率

勅具官某列職禁墀護兵邊圉比因朝譴願謝仕
塗尚軫衰遲久備驅使往貳官坊之率猶兼稟奉
之資歸安汝躬厥恩甚茂

張埴守將作監主簿

端明集一一

十一

茂

勅張奎孫某唯乃祖修身泣官清白恭畏屢更寄
委靡憚勤勞奄尔淪亡念其子姓即正舊秩往服
恩茂可

表胄試將作監主簿昭州教授

勅表胄向有恩旨嶺嶠之外歷訪遺材今守臣與
使本道者以尔伏膺典墳不求仕進願加寵命用
勸遐俗往試名於京秩仍闡教於州庠欽服甄掄
益勵誠節

莆陽居士蔡公文集卷第十一



